

# Memorandwm Cydsyniad Deddfwriaethol Atodol (Memorandwm Rhif 2) Llywodraeth Cymru ar Fil yr Heddlu, Troseddu, Dedfrydu a'r Llysoedd

Tachwedd 2021



## 1. Cefndir

1. Cyflwynwyd Bil yr Heddlu, Troseddu, Dedfrydu a'r Llysoedd ('y Bil') yn wreiddiol yn Nhŷ'r Cyffredin, a chafodd ei ddarlleniad cyntaf ar 9 Mawrth 2021.<sup>1</sup> Caiff ei noddi gan y Weinyddiaeth Gyfiawnder. Cafodd y Bil<sup>2</sup> ei ailgyflwyno ar 18 Mai 2021 yn dilyn cynnig cario drosodd.
2. Cwblhaodd y Bil ei gyfnodau yn Nhŷ'r Cyffredin ar 5 Gorffennaf 2021. Fe'i cyflwynwyd i Dŷ'r Arglwyddi ar 6 Gorffennaf 2021,<sup>3</sup> cwblhaodd ei ail ddarlleniad ar 14 Medi 2021 ac mae'r Bil yn y cyfnod Adrodd ar hyn o bryd.

## Memorandwm Cydsyniad Deddfwriaethol Llywodraeth Cymru

3. Ar 28 Mai 2021, gosododd Jane Hutt AS, y Gweinidog Cyfiawnder Cymdeithasol (y Gweinidog), Femorandwm Cydsyniad Deddfwriaethol<sup>4</sup> (y Memorandwm) gerbron y Senedd mewn perthynas â'r Bil.
4. Gwnaethom adrodd<sup>5</sup> ar y Memorandwm Cydsyniad Deddfwriaethol ar 14 Hydref 2021. Ymatebodd y Gweinidog i'n hadroddiad ar 12 Tachwedd.<sup>6</sup>
5. Mae paragraffau 10 i 16 o'r adroddiad hwnnw yn nodi'r cymalau yn y Bil y mae angen cydsyniad y Senedd ar eu cyfer, ac yn nodi lle y mae anghytundeb yn codi rhwng Llywodraeth Cymru a Llywodraeth y DU.

## Memorandwm Cydsyniad Deddfwriaethol Atodol Llywodraeth Cymru

6. Ar 5 Tachwedd 2021, gosododd y Gweinidog Femorandwm Cydsyniad Deddfwriaethol Atodol<sup>7</sup> (Memorandwm Rhif 2) ar gyfer y Bil.

---

<sup>1</sup> Bil yr Heddlu, Troseddu, Dedfrydu a'r Llysoedd [Bil Tŷ'r Cyffredin 268, 2019-21]

<sup>2</sup> Bil yr Heddlu, Troseddu, Dedfrydu a'r Llysoedd [Bil Tŷ'r Cyffredin 5, 2021-22]

<sup>3</sup> Bil yr Heddlu, Troseddu, Dedfrydu a'r Llysoedd [Tŷ'r Arglwyddi 40]

<sup>4</sup> Llywodraeth Cymru, Memorandwm Cydsyniad Deddfwriaethol Bil yr Heddlu, Troseddu, Dedfrydu a'r Llysoedd, Mai 2021

<sup>5</sup> Adroddiad y Pwyllgor Deddfwriaeth, Cyfiawnder a'r Cyfansoddiad, Memorandwm Cydsyniad Deddfwriaethol Llywodraeth Cymru ar Fil yr Heddlu, Troseddu, Dedfrydu a'r Llysoedd, Hydref 2021

<sup>6</sup> Llythyr gan y Gweinidog Cyfiawnder Cymdeithasol, 12 Tachwedd 2021

<sup>7</sup> Llywodraeth Cymru, Memorandwm Cydsyniad Deddfwriaethol Atodol Bil yr Heddlu, Troseddu, Dedfrydu a'r Llysoedd, Tachwedd 2021

---

- 7.** Cytunodd y Pwyllgor Busnes y dylai'r Pwyllgor Deddfwriaeth, Cyfiawnder a'r Cyfansoddiad gyflwyno adroddiad ar Femorandwm Rhif 2 erbyn 25 Tachwedd 2021.<sup>8</sup>
- 8.** Mae Memorandwm Rhif 2 yn ymwneud â diwygiad i gymal 17 (Cyfarwyddydau) yn y Bil fel y cytunwyd arno yn Nhŷ'r Arglwyddi. Mae Cymal 17 yn rhan o gyfres o gymalau'n ymwneud â thrais difrifol (cymalau 7 i 22)
- 9.** Mae'r Memorandwm gwreiddiol yn nodi bod angen cydsyniad y Senedd ar gyfer cymalau 7, 8, 10 i 16 a 19 i 22<sup>9</sup>, ac mae'n argymhell na ddylai'r Senedd roi ei chydsyniad i gymalau 9, 17 a 18, gan nodi'r hyn a ganlyn:

*"Y pryder ynghylch y pwerau newydd hyn sy'n caniatáu i'r Ysgrifennydd Gwladol roi cyfarwyddyd at ddibenion gorfodi'r ddyletswydd trais difrifol yw y gallai'r Ysgrifennydd Gwladol o bosibl roi cyfarwyddyd ar faterion sydd wedi eu datganoli sy'n dod o fewn cylch gwaith awdurdodau Cymreig datganoledig".<sup>10</sup>*

## **Diwygio cymal 17 o'r Bil**

---

**10.** Mae cymal 17 yn rhan o gyfres o gymalau sy'n ei gwneud yn ofynnol i awdurdodau cyhoeddus lleol weithio gyda'i gilydd mewn partneriaethau trais difrifol i fynd i'r afael â thrais difrifol (y cyfeirir ato ym Memorandwm Rhif 2 fel y Ddyletswydd Trais Difrifol).

**11.** Mae Memorandwm Rhif 2 yn nodi:

*"I gymal 17 y cynigir gwneud y gwelliannau sydd o dan sylw yn y Memorandwm Cydsyniad Deddfwriaethol hwn, ond maent yn ymwneud â chymalau 9 i 22. Argymhellwyd na ddylai Senedd Cymru roi ei chydsyniad ar gyfer y cymalau hyn oherwydd yn y Bil fel y'i cyflwynwyd, y mae Memorandwm Rhif 1 yn ymwneud ag ef, dyletswydd i ymgynghori oedd cymal 17 yn hytrach na dyletswydd i gael cydsyniad Gweinidogion Cymru."<sup>11</sup>*

**12.** Mae Memorandwm Rhif 2 yn egluro bod y diwygiad perthnasol yn "dileu'r gofyniad ar yr Ysgrifennydd Gwladol i ymgynghori â Gweinidogion Cymru" ac yn lle hynny, "rhaid i'r

---

<sup>8</sup> Pwyllgor Busnes, [Amserlen ar gyfer ystyried Memorandwm Cydsyniad Deddfwriaethol Atodol Bil yr Heddlu, Troseddu, Dedfrydu a'r Llysoedd](#), Tachwedd 2021

<sup>9</sup> Llywodraeth Cymru, Memorandwm, paragraff 12

<sup>10</sup> Llywodraeth Cymru, y Memorandwm, paragraff 14

<sup>11</sup> Llywodraeth Cymru, y Memorandwm Atodol, tudalen 2

---

Ysgrifennydd Gwladol gael cydsyniad Gweinidogion Cymru cyn cyfarwyddo awdurdod Cymreig datganoledig." Mae'n ychwanegu bod Llywodraeth Cymru yn cefnogi'r diwygiad.<sup>12</sup>

## Safbwynt Llywodraeth Cymru

---

**13.** Mae paragraffau 7 ac 8 o Femorandwm Rhif 2 yn nodi:

*"Gan fod y gwelliant i gymal 17 wedi'i sicrhau, fel y nodir uchod, rydym nawr yn argymhell y dylid rhoi cydsyniad i gymalau 9 i 22 o'r Bil (y cymalau Dyletswydd Trais Difrifol), y mae angen cydsyniad deddfwriaethol Senedd Cymru ar gyfer pob un ohonynt.*

*Mae trafodaethau rhynglywodraethol yn parhau ynglŷn â gweddill y darpariaethau y mae Llywodraeth Cymru ar hyn o bryd yn argymhell na ddylai Senedd Cymru roi ei chydsyniad ar eu cyfer sef (yn y Bil fel y'i cyflwynwyd): 'criminal damage to memorials' (cymal 46), 'unauthorised encampments' (cymal 61) a chymalau 54, 55 a 60 ynglŷn â'r drefn gyhoeddus. Bydd Memoranda Cydsyniad Deddfwriaethol pellach yn dilyn fel y bo'n briodol, cyn y ddadl ynglŷn â'r cydsyniad deddfwriaethol."*

## 2. Ystyriaeth y Pwyllgor

**14.** Trafodwyd Memorandwm Rhif 2 yn ein cyfarfod ar 15 Tachwedd 2021.<sup>13</sup>

### Ein barn ni

**15.** Nodwn fod Memorandwm Rhif 2 yn ymwneud â diwygiad i gymal 17 o'r Bil, hynny yw, ei bod nawr yn ofynnol i'r Ysgrifennydd Gwladol gael cydsyniad Gweinidogion Cymru cyn rhoi cyfarwyddyd i awdurdod datganoledig yng Nghymru o dan y cymal hwnnw.

**16.** Nodwn fod Llywodraeth Cymru wedi nodi ym Memorandwm Rhif 2 ei bod yn fodlon bod y Bil yn darparu amddiffyniad priodol o ran y rhyngweithio gydag awdurdodau Cymreig datganoledig a materion datganoledig eraill.<sup>14</sup>

---

<sup>12</sup> Llywodraeth Cymru, Memorandwm Rhif 2, tudalen 2

<sup>13</sup> Y Pwyllgor Deddfwriaeth, Cyfiawnder a'r Cyfansoddiad, 15 Tachwedd 2021

<sup>14</sup> Llywodraeth Cymru, Memorandwm Rhif 2, tudalen 2

---

**17.** Wrth wneud hynny, ac fel yr amlygwyd yn ymateb y Gweinidog inni ar 12 Tachwedd, mae hyn yn mynd i'r afael â'r argymhelliad yn ein hadroddiad ar y Memorandwm, a ofynnodd am ddiweddariad ar y sefyllfa ynghylch cymalau 17 a 18.

**18.** Gwnaeth ein hadroddiad gwreiddiol nodi ansawdd gwael y Memorandwm. Mae'n siomedig, felly, bod y wybodaeth sydd wedi'i chynnwys ym Memorandwm Rhif 2 yn peri dryswch. Yn benodol, hoffem nodi'r pwyntiau a ganlyn:

- mae Memorandwm Rhif 2 yn hepgor unrhyw gyfeiriad at gymalau 7 ac 8, sy'n rhan o'r gyfres o ddarpariaethau sy'n ymwneud â'r ddyletswydd trais difrifol;
- nid yw'n glir ar unwaith sut mae'r diwygiad i gymal 17 yn ymwneud â "chymalau 9 i 22" fel y nodir ym Memorandwm Rhif 2;<sup>15</sup>
- mae Memorandwm Rhif 2 yn awgrymu bod Llywodraeth Cymru wedi argymhell yn y Memorandwm na ddylai'r Senedd roi ei chydsyniad i gymal 10 i 16 a 19 i 22,<sup>16</sup> ond mewn gwirionedd argymhellodd fod y Senedd yn rhoi cydsyniad i'r darpariaethau hynny;<sup>17</sup>
- cyfeiriodd y Memorandwm at gymalau 62 a 63 o'r Bil yn ymwneud â gwerysloedd diawdurdod (heb gyfeirio at y rhifau cymalau penodol), fel darpariaethau yr oedd Llywodraeth Cymru o'r farn eu bod o fewn cymhwysedd deddfwriaethol y Senedd ac yr oedd Llywodraeth Cymru yn argymhell y dylai'r Senedd wrthod cydsyniad ar eu cyfer. Fodd bynnag, nid yw paragraff 8 o Femorandwm Rhif 2, sy'n rhestru'r darpariaethau y mae Llywodraeth Cymru ar hyn o bryd yn argymhell na'r ddylai Senedd roi ei chydsyniad ar eu cyfer (ac sy'n parhau'n destun trafodaethau rhynglywodraethol), yn cyfeirio at gymalau 62 a 63.

**19.** Mae'n bwysig bod Aelodau o'r Senedd yn cael gwybodaeth gywir, a'u bod yn glir ynghylch pa gymalau y gofynnir iddynt ystyried rhoi cydsyniad iddynt o fewn Bil y DU.

**Argymhelliad 1.** Dylai'r Gweinidog, cyn y ddadl ar y cynnig cydsyniad perthnasol, gadarnhau pam nad oedd Memorandwm Rhif 2 ar y Bil yn cyfeirio at gymalau 7 ac 8, ac esbonio hefyd sut mae cymal 17 yn ymwneud â chymalau "9 i 22" fel y nodir ym Memorandwm Rhif 2.

---

<sup>15</sup> Llywodraeth Cymru, Memorandwm Rhif 2, tudalen 2

<sup>16</sup> Llywodraeth Cymru, Memorandwm Rhif 2, tudalen 2

<sup>17</sup> Llywodraeth Cymru, Memorandwm, paragraff 12

---

**Argymhelliad 2.** Dylai'r Gweinidog, cyn y ddadl ar y cynnig cydsyniad perthnasol, gadarnhau safbwynt Llywodraeth Cymru ynghylch pa gymalau yn y Bil y mae angen cydsyniad y Senedd ar eu cyfer, a hefyd:

- y cymalau y mae'n argymhell rhoi cydsyniad ar eu cyfer;
- y cymalau nad yw'n argymhell rhoi cydsyniad ar eu cyfer.

**20.** Yn hyn o beth, rydym yn croesawu'r ffaith fod llythyr y Gweinidog ar 12 Tachwedd, a oedd yn ymateb i argymhelliad 2 yn ein hadroddiad gwreiddiol, wedi cadarnhau bod angen cydsyniad y Senedd ar gymal 42 o'r Bil.